

# Elkartasuna adierazi diete presoei Langraizen

*Asteazkenean hilabete beteko dute  
gose greban, eta ekintzak egingo dira*

Erredakzioa / Gasteiz

Presoen lagun Donostiatik, Bilbotik eta Gasteiztik etorriek elkartasuna adierazi zieten Langraizko espetxean gose greban dauden presoei. Menditik joan ziren espetxeraino, atzealdean baitaude bilduta. Horrela, elkar agurtzeko eta ikusteko parada izan zuten.

GOSE greban dauden presoei elkartasuna adierazteko saioa egin zuten atzo Langraizen, Arabako espetxean. Donostiatik, Bilbotik eta Gasteiztik etorri ziren gose greban dauden bost presoen senide eta lagunak, eta espetxearen atzealdean biltzeko, menditik egin behar izan zuten ibilaldia.

Pankartak, ikurrinak eta aministia aldarrikatzeko idatzia zeramatzaten, gose greban dauden presoek ikus zitzaten. Arratsaldean hotz ikaragarria egiten zuen Lan-

graizen, eta nahiz eta jende edadetua egon senideen eta lagunaren artean, helburua lortu zuten.

Atzo Langraizen egindakoa gaur Basaurin egingo dute, herenegun Martuteneko espetxearen aurrean egin zuten bezala. Basaurira Ordizia, Pasaia eta Barakaldoko kideak joango dira, bertan dauden gose grebalariak herri horietakoak baitira. Atzo Donostiako hainbat auzotatik bizikletaz joan ziren Martuteneko espetxera, eta Intxaurrondo auzoan 50



EDORIA OTSOA

Donostia, Bilbo eta Gasteiztik joandako senide eta lagunak kontzentratu ziren Langraizko espetxearen aurrean.

lagun kontzentratu ziren, larunbatero protesta hori bera egitea erabakita.

Bestalde, gaur eguerdian amaituko da Sakanako ELA-ko ordezkariak Altsasun egin duten baraualdia presoen eskubideen errespetua eskatzeko. Bihar, berriz, LABeko Idazkaritza Nazionaleko kideek hasiko dute lau eguneko gose greba, Donostiako Ibaetako kanpusean.

## Mobilizazio eguna asteazkenerako

Datorren asteazkenean, abenduak 1, hilabete beteko dute gose greban 20 euskal presok. Hori dela eta, Amnistia-aren Aldeko Batzordeek mobilizazio eguna antolatu dute. Alde batetik, grebalariak pairatzen hasi diren osasun ondorioez ohartarazi nahi dute gizartea. Bestetik,

euskal presoen Euskal Herri-ratzea eta prozesu politikoan parte hartzeko eskubidea aldarrikatuko dute. «Agente politiko eta sozial guztiak baldintza beretan parte hartu behar dute Euskal Herriaren erabakitzeko gaitasuna onartuko duen prozesu politikoan, eta orduan amnistia lortu beharko dela azalduko da mobilizazio horien bidez», diote AABek.